



Inatsisartunut ilaasortamut
Pipaluk Lynge
Inuit Ataqtigiit

03-02-2026
Suliap normua 2024-10523

All. il.
26091266

Postboks 260
3900 Nuuk
Oqa. (+299) 34 50 00
Nass. (+299) 34 66 66
E-mail: miin@nanoq.gl
www.naalakkersuisut.gl

Ineqarnermi pissutsit aamma inissiisarnerit pillugit §37 naapertorlugu apeqquaqqaammut nr. 232-mut akissuteqaat

Asasara Pipaluk Lynge.

Apeqqutinut qujanaq. Apeqqutit ataasiakkaarlugit akissutinik malitseqartillugit ataani allanneqaqqipput.

1. Ilaqutariit meeqqaminnik pisortanit arsaagaasimasut, inissaqannginnertik peqqutigalugu meeqqaminnik angerlartitsisinnaanngitsut pillugit naalakkersuisut qanoq aaqqiinissaminnut pilersaaruteqarpat?

a) Ineqarnermut, Attaveqaasersuutitut Isorliunerusunullu Naalakkersuisup suliamut tamatumunnga suleqataanera nassuiaqqara.

Ineqarnermut, Attaveqaasersuutitut Isorliunerusunullu Naalakkersuisoqarfimmiit akissutinut ilanngussanik katersisoqarpoq.

Ineqarnermut, Attaveqaasersuutitut Isorliunerusunullu Naalakkersuisoq Meeqqanut, Inuusuttunut, Ilaqutariinnullu kiisalu kommunit peqatigalugit ataatsimut isigalugu killiliussat, taakkua meeqqanut inissinneqarsimasunut pingaaruteqartut pillugit, ilaatigullu inissianik naleqquttunik pissarsisinnaaneq pillugu qanimut suleqateqarpoq. Tamanna ilaatigut isumaginninnikkut innersuussisarnermi maleruagassanut inatsisinik tunngaviusunillu ineriartortitsinikkut pisarpoq. Tamatuma saniatigut inissiaqafiup isumaginninnikkut suliniutit qanoq pitsaanerpaamik tapersiiffigisinnaanera pillugu oqaloqatigiinnikkut ingerlasarpoq. Inissiisarnerit angerlartitseqqittarnerillu pillugit aalajangiisarnerit immikkut ittut kommuninit aalajangerneqartarput, suliassat taakku kommunit oqartussaaffigisaasa aamma isumaginninnermut inatsisit ataaniimmata.

Ineqarnermut, Attaveqaasersuutitut Isorliunerusunullu Naalakkersuisoq taamaalilluni siunnersuinikkut kiisalu inatsisitigut sinaakkutinik aaqqiissuussaannikkut aaqqiissutissanik tapersersuisarpoq. Tamanna kommunit



oqartussaaffeqarnermikkut suliassaminnik suliarinnittarnissaannut periarfissanik pitsaannerusunik pilersitsivoq. Tamanna aamma atuuppoq inissaaleqineq meeqqanik angerlartitseqqinnissamut akornutaalersarnera.

2. Meeqqanut Ilaqutariinnullu Naalakkersuisuusimasup sulissutigisimavaa meeqqat angajoqqaaminnut piniassammata, inissaaleqineq akiorniarlugu, ilaqutariillu peqatigiilleqqinnissaat aguniarlugu Naalakkersuisoqarfiit akimorlugit suleqatigiissutigineqassaasoq, suliaq aallartissimava?

Inissiisarneq aatsaat pisarpoq meeqqap atugarissaarnera isumannaatsuuneralu ulorianartorsiortinneqarpat aammalu inatsimmi piumasaqaatit eqquutsinneqarsimappata — inissiaqarnerup qanoq innera kisiat pinnagu — aammalu kommunip aamma pinaveersaartitsiniartarpoq ilaqutariillu tapersersorniarlugit suliniuteqartarpoq, ajornartorsiutit annertusiartunnginniassammata.

3. Inissaaleqineq akiorniarlugu sunik Naalakkersuisut pilersaaruteqarpat?

Ineqarnermut, Attaveqaasersuutitut Isorliunerusunullu Naalakkersuisoqarfimmiit akissutitut ilanngussanik katersisoqarpoq.

Inissaaleqineq pillugu ataatsimut isigalugu Naalakkersuisut inissiaqarfimmi tamakkiisumik siunissarlu ungasinnerusooq isigalugu nutarterinissaaq sulissutigaaq. Suliaq inissianik nutarterinermut tunngaveqarpoq, taannalu inissiaqarfimmi pitsaannerusumik oqimaaqatigiissitsinissaaq siunertaralugu ataqatigiissaakkanik arlalinnik imaqarpoq. Nutarterinermut suliniummi ilaatigut ilaapput Namminersorlutik Oqartussat inissiaataannik ukiuni 20-ni nutarterinissamut suliniuteqarnissaat, inissianik aningaasaliissuteqartarnerup aaqqiissuteqqinneqarnissaat, inissianik isumannaallisaanermut malittarisassat nutarterneqarnissaat, attartornermut inatsimmik nutaamik suliarineqarnissaaq, kiisalu Namminersorlutik Oqartussat inissiaataannik annertuumik annikillisaanissaaq siunertaralugu sulissuteqarnissaaq innuttaasullu namminneq inissiaqartinnissaannut periarfissaqarnerat.

Ataatsimut isigalugu immikkoortut minnerusut taakku inissiaqarfimmi pitsaannerusumik oqimaaqatigiissitsinissamut iluaqutaasariaqarput, tassani pisortat inissiaataat innuttaasunut namminneq inissiamik pissarsisinnaanngitsunut annertunerusumik tunngatinneqarnerussallutik, tamatumalu saniatigut inissianik suliaqarnerup ingerlalluarnissaanut sinaakkutinik nukittorsaasoqarluni.

4. Inissaaleqineq akiorniarlugu Kommunit suleqatigineqarpat?

Ineqarnermut, Attaveqaasersuutitut Isorliunerusunullu Naalakkersuisoqarfimmiit akissutitut ilanngussanik katersisoqarpoq.

Nalinginnaasumik inissaaleqinermut tunngatillugu kommunit namminneq najugaqarfigisaminni inissaaleqinerup isumagineqarnissaanut qitiusumik akisussaaffeqarput. Tamanna ilaatigut kommunimi pilersaarusiornikkut sumiiffinni pilersaarusiornikkut, sanaartornikkut kiisalu kommunimi inissianik pilersuinerup najukkami pisariaqartitsineq naapertorlugu pingaarnersiuiinikkut pisarpoq. Aammattaaq ineqarnermut inatsit malillugu kommunit periarfissaqarput isumaginninnikkut ineqarnermut innersuussinissamut, taanna kommunit namminneq oqartussaaffigisaasa iluani isumagineqartarpoq kommunillu aningaasaliinissaa naatsortuutigineqarluni. Naalakkersuisut inatsiseqartitsinikkut aamma ineqarnermut aningaasalersuinikkut aaqqiissuussat aqquutigalugit inissiaqarfinni sinaakkutit ataatsimut isigalugu aalajangersartarpaat. Kommunit pisariaqartitsinerup annertussusaa malillugu suliamut tassunga peqataatinneqarput, ilaatigut oqaloqateqarnikkut, paasissutissanik pissarsiaqarnikkut aamma inatsisit pillugit tusarniaanermut atatillugu.



Kommunit inissiaqarfinni suliassaat aningaasartuutitut sinaakkutit iluanni aningaasalersorneqarput, naalagaaffimmit tapiissutit ilanngullugit.

5. Naalakkersuisut siuliisa inissaaleqineq akironiarlugu sulit “Housing first” aallartissmasaat sumut killippa?

Isumaginninnermut, Suliffeqarnermut Nunamullu Namminermut Naalakkersuisoqarfimmiit akissutitut ilanngussanik katersisoqarpoq.

Nuummi Blok 8-mi neqeroorut Housing First pilersinneqarpoq. Suliniut misileraalluni suliniutitut ingerlanneqarpoq kingusinnerusukkut illoqarfinnut allanut siammarterneqarnissaa siunertaalluni. Suliniut annertusarneqannginneranni misileraalluni suliniut nalilersorneqartariaqarpoq. Naliliinermut tassunga sinaakkutitik aalajangersaasoqarnissaa ullumikkut sulissutigineqarpoq.

Inussiarnersumik inuulluaqqusillunga

Nivi Olsen